



Pli baud pasculavan vatgas sin il bain Muglin a Müstair.



Bletschergnims ed idilla da camping.

Sis manaschis stattan en nomina – mo in gudogna

Las duas organisaziuns da muntogna preschentan ils manaschis

DA CLAUDIA CADRUVI / ANR

■ **Il runal da Tenna ed il campadi da Müstair concurrin cun quatter auters manaschis per il prix montagne 2015. Il victur survegn 40 000 francs.** Fin l'emprim da settember ston ils manaschis nominads anc avair pazienza. Pir quel di dattan las duas organisaziuns da muntogna svizras che concedan il premi enconuscent tgi che survegn la distincziun.

16 manaschis han inoltrà quest onn ina candidatura. Ier ha la giuria dal prix montagne preschentà ils sis manaschis che han surmuntà l'emprima selecziun. «Ils nominads cumprovan ch'ins po producir rauba singulara e realisar buns concepts sch'ins sa chatta lunsch davent dals centers», di *Bernhard Russi* sco president da la giuria. «Las persunas che stattan davos quests projects procuran che la regiun da muntogna resta viscla. Jau less ch'era auters muntagnards prendian a maun lur avegnir cun tant curaschi.»

En la comunicaziun da pressa da las duas organisaziuns da muntogna svizras vegnan ils nominads preschentads sco suonda:

Il campadi Muglin a Müstair

Là nua che vatgas pasculavan avant intgins onns dorman oz giasts ord tut l'Europa. Ils frars Zangerle han bajegià enturn il bain puril da lur bab e mainan oz in campadi. Durant la davosa stagiun han 7500 giasts pernottà a Muglin. Ils blers en stads inchantads, perge il cam-

padi è situà ordvart bain. En l'anterieur clavà datti perfin indrizs da wellness.

Jean-François Roth, president da Svizra Turissem, sesa en la giuria. El di: «Ils frars Zangerle han profità da la chaschun ed han fatg or dal bain dals geniturs in campadi redaivel. Ils visitaders da l'entir mund apprezieschan l'ospitalità e la cultura rumantscha.» En il bistro dal camping «La Remisa» vegnan ils giasts numnadain en contact cun ils indigens ed audan era rumantsch.

Il runal solar a Tenna

Avant intgins onns era l'existenza dal runal en Val Stussavgia periclitada. Oz stat l'emprim runal solar dal mund a Tenna. El na vegn betg mo nizzegià per transportar skiunzs, mabain vala era sco ovra d'energia. L'indriz producescha quindesch giadas dapli current che quai ch'el consumescha. Dal runal profitescha l'entira regiun.

Il commember da giuria *Peter Niederer di*: «Ils da Tenna han prestà lavur da piunier e chapì da tschentiar in pitschen runal sin in nov fundament economic. Il success dat raschun ad els.»

L'idea da las puras dad Uri

75 puras da l'Uri porschan servetschs ordaifer lur bains purils e procuran uschia per entradas supplementaras per lur famiglias. Ellas s'occupan da giuven e vegl, cuschinan per entiras famiglias, gidan en il perchasa, surpiglian lavurs da nettegiar e furneschan spezialitads uranaisas per festas. Ils servetschs vegnan apprezziads da

blers clients. Quatter puras han avant diesch onns gi l'idea ed han mess en pe la chaussa.

Fista da passlung dal Tessin

Tauf Khamitov deriva da la Sibiria ed è stà campiun da passlung. Ensem cun sia dunna maina el la firma KV+ a Dongio en la Val dal Blegn. Els fabritgeschan mintg'onn passa 20 000 pèra fista da passlung ch'els vendan oravant tut en l'exteriur. I sa tracta da fista d'alta qualitad.

Hotel per seminaris a Filzbach

Dal hotel Lihn a Filzbach han ils giasts ina bellezza vista sin il Lai Rivaun circumdà da culms impressiunants. La simpla chasa da giasts da pli baud è daventada oz in hotel da seminaris. I n'è betg mo gartegià da posiziunar a moda ferma il manaschi, mabain era da cuntinuar cun l'engaschi social che aveva gia adina tradiziun en questa chasa. En l'hotel lavuran 16 emprendists che sa chattan en ina fasa difficila da vita. Els enritgeschan tant il manaschi d'hotel sco er ils giasts che sa trategnan en l'hotel glarunais.

Butias en ils vitgs dal Vallais

La «Edelweiss Market» n'è betg ina chadaina da butias sco tut las autras, ella sa drizza spezialmain als basegns dals vitgs vallesans. Ils 80 collavurats da las 18 butias s'adatteschan adina a las atgnadads localas. Ch'ins fa amogna products locals e porscha anc ulteriurs servetschs sa chapescha da sasez.



En la stalla hai uss in indriz da wellness.



La cooperativa ha investì 1,4 milliuns francs per bajegià il runal a Tenna.



Uss vegn fatg fain là nua ch'ils skiunzs van l'enviern cun skis.



Otg plazzas parzialas porscha il runal da Tenna durant la stagiun.